

欽定八旗通志卷一百九十八

人物志七十八

大臣傳六十四

漢軍正白旗三 徐治都 王國昌 費雅達 偏圖 黃國材

宜兆熊 石文焯

徐治都

徐治都漢軍正白旗人二等男徐大貴子初任佐領兼叅領康熙七年擢直隸天津總兵八年調湖廣襄陵總兵十三年正月逆藩吳三桂陷湖南沅

州治都率兵赴援旋以四川巡撫羅森總兵譚宏
叛應吳逆治都奉

詔自常德回守彝陵三月叛鎮楊來嘉劉之復等擁眾數
萬乘舟犯彝陵治都率兵撲勦賊眾登岸誘戰驟
以飛棹薄我城治都先已布置嚴密水陸相犄角
擊却賊眾八月楊來嘉糾黨據南漳各寨分路出
犯治都同襄陽總兵劉成龍率兵征勦斬殺過半
上嘉治都久守衝要下部議敘加左都督銜初治都赴援

常德其妻許氏聞隣境兵民多從逆權以治都令
約鎮標將弁撫慰士卒曉以大義并脫簪珥服飾
以資犒勞彝陵右瀕江總兵官廨在江濱十五年
四月賊衆駕船數百來犯治都沿江堵截賊突逼
官廨鎗礮齊發許氏中礮死湖廣總督蔡毓榮提
督桑額合疏以

聞具述治都矢志忠貞奮不顧家狀十八年三月擢湖廣
提督四月僞將軍王鳳岐擁賊衆據巫山

上慮江水泛漲時賊乘虛突犯夔陵荊州

命治都嚴行堵禦七月疏言夔陵一隅爲楚蜀咽喉今賊

據巫夔上游呼吸可至宜速修五板戰艦一百並

招募土著水手操練嫻熟令夔陵鎮臣胡世英統

領以備水路防勦臣同襄陽總兵劉成龍前赴歸

州興安巴東形勢之地相機進勦事下所司議行

詔治都同四川總督楊茂勲統舟師征夔州重慶十九年

正月師至巫山楊來嘉王鳳岐與僞總兵王存仁

集賊衆萬餘負險自固我師奮勇奪山隘賊衆奔
潰復以數騎突犯治都揮刀力戰敗之楊來嘉棄
馬越山而遁王鳳岐就擒陣斬三千餘級復巫山
縣城乘勝規取夔州僞將軍劉之衡僞總兵瞿洪
陞開關納款遂復夔州府城叛鎮譚宏遣子僞將
軍譚天秘率僞總兵譚地晉譚地升繳敕印詣軍
門降治都奉

詔還守夔陵荊州諸處九月譚宏譚天秘等復叛瀘州叙

州俱陷夔州震動治都同鎮安將軍噶爾漢統兵
溯江而上分軍三隊擊賊陣擒偽總兵易文奇進
抵下關城賊衆望風膽落棄關而遁追斬甚衆餘
賊奔入雲陽二十年進征雲陽屢挫賊鋒擒偽總
兵向旭暉時譚宏死譚天秘勢窮竄遁萬縣梁山
忠州悉平敘功晉階四等二十七年湖廣督標裁
兵夏逢龍糾衆倡亂據武昌城治都赴勦至應城
縣遇賊衆擊却之隨駐軍應城賊衆環逼治都分

兵內外夾擊賊大潰奔德安逢龍聚賊衆齊赴金
口以僞總兵楊兆先潛襲我軍後路治都偵知賊
情水陸嚴戒旣而蒲圻兵縛楊兆先赴軍前降餘
賊鼓譟來犯復乘北風排巨艦二十順流而下見
我水師嚴整不敢近遂泊龍川磯下登岸衝我營
壘我軍奮勇掩擊晝夜鏖戰斬殺殆盡逢龍勢窮
合賊衆駕船泊鯉魚寮欲給我軍出敵乘虛犯我
陸營治都遣叅將鄭興都司楊明錦協力防禦自

續戰艦沿江施鎗礮焚毀賊船賊旋犯我陸營復
戰却之斬七百餘級溺水死者無算僞總兵胡耀
乾率僞文武官以城降治都入武昌安撫軍民逢
龍竄黃州會振武將軍瓦岱統八旗兵至聞武昌
賊潰追至黃州僞總兵趙得等至軍前投誠黃岡
生員宜畏生擒逢龍以獻磔于市武昌黃州悉平
治都報捷得

旨嘉獎

賜戴孔雀翎敘功予雲騎尉世職三十二年入

覲

賜御用冠服三十三年

詔嘉其勞績茂著視提督孫思克施琅之例

特授爲鎮平將軍仍管提督事三十六年閏三月卒年六

十有七贈太子少保

賜祭墓如典禮諡襄毅長子永泰先于康熙十九年襲徐

大貴二等男爵次子永年襲雲騎尉職

王國昌

王國昌漢軍正白旗人康熙七年由官學生補內閣筆帖式尋改辦事中書遷侍讀歷遷刑部郎中監察御史內閣侍讀學士二十八年隨內大臣索額圖等赴尼布楚與俄羅斯議定界事竣還擢內閣學士三十一年授兵部督捕右侍郎三十四年丁繼母憂時廷議三路征噶爾丹中路以左都御史于成龍督運軍糧

命國昌以原銜偕大理寺卿喻成龍赴西路督運三十五

年正月授

敕印二月西路大將軍費揚古裹五十日糧進勦約國昌

等輓運以濟屆期未至五月大軍自昭莫多凱旋

國昌等運米四千一百餘石還屯烏喇特部界請

旨

詔就近分給喀爾喀親王善巴等七旗兵十月

敕國昌同于成龍等由呼坦和朔運米至喀喇穆掄軍營

贖前遲誤罪並坐塘効力三十六年正月大軍由
寧夏肅州兩路追勦噶爾丹國昌復同于成龍等
請自備駝馬運糧

允之會噶爾丹竄斃軍還停運十一月部臣請追議國昌
前罪有

旨寬免仍著議敘加四級三十七年擢山東巡撫三十八
年

上南巡國昌迎

薦

御書圭璋特達額並淵鑒齋法帖

賜之又

賜御用夏冠袍服四十年二月吏科給事中馬士芳劾國

昌于大計重典濫薦厯城令管承寵又徇庇溺職
之長清令崔錫榮不行題叅

諭令明白回奏尋

諭大學士等曰朕聽政四十餘年凡條奏之事稍有私意

斷不能欺朕馬士芳特不喜漢軍居督撫之任故將王國昌叅奏朕所知漢人數員已盡置外任果如張鵬翮李光地郭琇者能有幾人朕曾問李光地云山東巡撫王國昌雖無過人之才但心性和平地方尚受其益果在地方安靜卽百姓之福矣五月國昌疏辨部議管承寵爲巡撫私人並無實據應免議其溺職之崔錫榮該撫不于大計題叅應降一級准抵從之四十二年六月疏陳東省便民事宜一倉穀遵例存七

倉一德州倉米支放各營兵糧向係四季徵收
春夏農忙時輸將難猝辦應動司庫銀買米支放
其額徵米石俟秋後徵一額徵班匠銀四千餘兩
均入地丁項下徵解一營舊基地聽民墾種輸
租卽於開墾之年陞科給印帖俾爲恒業下部議
行閏六月疏報萊蕪新泰東平沂州蒙陰沂水六
州縣被水請開倉賑卹議如所請國昌又自捐俸
三千三百兩補賑十月

上南巡回鑾

賜御書法理寬平清慎勤二額及表裏常交正動靜自弗
違聯四十二年七月疏報新泰等州縣復被水災
請將倉穀百二十餘萬石並應運漕米十餘萬石
平糴但倉穀不便久懸仰祈

聖慈暫開事例以實倉貯至動用漕米擬將康熙四十三
年以後俸工捐補部議平糴銀於次年秋收後買
穀還倉所捐俸工令地方官發買籽粒牛隻助民

穀還倉所捐俸工令地方官發買籽粒牛隻助民耕種其請開事例無庸議先是

上以巡視河工過濟南軫念東省去歲被災降

旨蠲免錢糧並

命總督桑額以漕米二萬石交總河張鵬翮選員運赴濟

寧兗州等屬平糶加賑桑額另運米二萬石于泰

安一路協濟至是國昌疏報桑額所運米遵

旨散給河臣張鵬翮亦委員運米到東隨卽酌撥各屬並